

安徽古籍叢書

黃山書社

分篇水經注

下

〔北魏〕酈道元〔注〕

〔清〕戴

震〔分篇〕

楊應芹〔校點〕

分篇水經注

下

〔北魏〕酈道元注

〔清〕戴震分篇

楊應芹校點

安徽古籍叢書

黃山書社

汶水

汶水出泰山萊蕪縣原山，西南過其縣南。

萊蕪縣在齊城西南，原山又在縣西南六十許里。地理志，汶水與淄水俱出原山〔一〕，「西南入濟」。故不得「過其縣南」也。從征記曰：「汶水出縣西南流。」又言，自入萊蕪谷，夾路連山百數里。水湟多行石澗中〔二〕。出藥草，饒松柏。林藿縣濛，崖壁相望。或傾岑阻徑，或迴巖絕谷。清風鳴條，山壑俱響。陵高降深，兼惴慄之懼；危蹊斷徑，過懸度之艱。未出谷十餘里，有別谷在孤山。谷有清泉，泉上數丈，有石穴二，口容人行。人穴丈餘，高九尺許，廣四五丈，言是昔人居山之處，薪爨煙墨猶存。谷中林木緻密，行人渺有能至矣。又有少許山田，引灌之蹤尚存。出谷有平丘，面山旁水，土人悉以種麥。云此丘不宜殖稷黍而宜麥，齊人相承以殖之。意謂麥丘所棲愚公谷也。何其深沈幽翳，可以託業怡生如此也！余時逕此，爲之踟躕，爲之屢眷矣。余按麥丘愚公在齊，川谷猶傳其名，不在魯，蓋志者之謬爾。

汶水又西南，逕贏縣故城南，春秋左傳：「桓公三年，公會齊侯於贏，成婚於齊也。」

又西南，過奉高縣北，

奉高縣，漢武帝元封元年立，以奉泰山之祀，泰山郡治也。縣北有吳季札子墓，在汶水南曲中。季札之聘上國也，喪子於嬴博之間，即此處也。從征記曰：『嬴縣西六十里，有季札兒冢。冢圓，其高可隱也。』前有石銘一所，漢末奉高令所立，無所述敘，標誌而已。自昔恒蠲民戶灑埽之，今不能，然碑石麤碎，靡有遺矣，惟故跌存焉。

屈從縣西南流。

汶出牟縣故城西南阜下，俗謂之胡盧堆。淮南子曰：『汶出弗其。』高誘曰：『山名也，或斯阜矣。』牟縣故城在東北，古牟國也。春秋時，牟人朝魯，故應劭曰：『魯附庸也。』俗謂是水爲牟汶也。又西南，逕奉高縣故城西，西南流，注於汶。

汶水又南，右合北汶水。水出分水谿，源與中川分水，東南流，逕泰山東，又合天門下谿水，水出泰山天門下谷，東流。古者帝王升封，咸憩此水。水上往往有石竅存焉，蓋古設舍所跨處也。馬第伯書云：『光武封泰山，第伯從登山。去平地二十里，南向極望，無不覩。其爲高也，如視浮雲。其峻也，石壁竄窳，如無道徑。遙望其人，或爲白石，或雪。久之，白者移過，乃知是人。仰視巖石松樹，鬱鬱蒼蒼，如在雲中。俯視谿谷，碌碌不可見丈尺。直上七里天門，仰視天門，如從穴中視天矣。』應劭漢官儀云：『泰山東南山頂，

名曰日觀。日觀者，鷄一鳴時見日，始欲出，長三丈許，故以名焉。」其水自谿而東，濬波注壑，東南流〔三〕。又合環水。水出泰山南谿，南流歷中，下兩廟間。從征記曰：「泰山有下、中、上三廟，牆闕嚴整。廟中柏樹夾兩階，大二十餘圍，蓋漢武所植也。赤眉嘗斫一樹，見血而止，今斧創猶存。門閣三重，樓榭四所，三層壇一所，高丈餘，廣八尺。樹前有大井，極香冷，異於凡水，不知何代所掘。不常浚渫，而水旱不減。庫中有漢時故樂器及神車、木偶，皆靡密巧麗。又有石虎建武十三年，永貴侯張余上金馬一匹，高二尺餘，形制甚精。中廟去下廟五里，屋宇又崇麗於下廟，廟東西夾澗。上廟在山頂，即封禪處也。其水又屈而東流，又東南逕明堂下。漢武帝元封元年，封泰山降坐明堂於山之東北趾。武帝以古處險狹而不顯也，欲治明堂於奉高旁而未曉其制。濟南人公玉帶，上黃帝時明堂圖。圖中有一殿，四面無壁，以茅蓋之，通水，圜宮垣爲複道，上有樓從西南入，名曰崑崙。天子從之人，以拜祀上帝焉。於是上令奉高作明堂於汶上，如帶圖也。古引水爲壁雍處，基瀆存焉，世謂此水爲石汶。山海經曰：「環水出泰山，東流注於汶。」即此水也。環水又左，入於汶水。

汶水數川合注，又西南流，逕徂徠山西。山多松柏，詩所謂「徂徠之松」也。廣雅曰：「道梓松也。」抱朴子稱玉策記曰：「千歲之松中有物，或如青牛，或如青犬，或如人，皆壽萬

歲。』又稱，天陵有偃蓋之松也，所謂樓松也。魯連子曰：「松樅高十仞而無枝，非憂正室之無柱也。」爾雅曰：「松葉柏身曰樅。」鄒山記曰：「徂徠山在梁甫、奉高、博三縣界，猶有美松，亦曰尤徠之山也。」赤眉渠帥樊崇所保也，故崇自號尤徠三老矣。山東有巢父廟，山高十里。山下有陂，水方百許步，三道流注。一水東北沿谿而下，屈逕縣南，西北流，入於汶。一水北流歷澗，西流入於汶。一水南流，逕陽關亭南。春秋，「襄公十七年，逆臧紇自陽關」者也。又西流，入於汶水也。

過博縣西北。

汶水西南逕龜陰之田。龜山在博縣北十五里，昔夫子傷政道之陵遲，望山而懷操，故琴操有龜山操焉。山北即龜陰之田也。春秋，「定公十年，齊人來歸龜陰之田」，是也〔四〕。汶水又南，逕博縣故城東。春秋，「哀公十一年，會吳伐齊取博」者也。灌嬰破田橫於城下。屈從其城南西流，不在「西北」也。

汶水又西南，逕龍鄉故城南，春秋，「成公二年，齊侯圍龍，龍囚頃公嬖人盧蒲就魁，殺而膊諸城上，齊侯親鼓取龍」者也。漢高帝八年，封謁者陳署爲侯國。

汶水又西南，逕亭亭山東，黃帝所禪也。山有神廟，水上有石門，舊分水 downstream 處也。

汶水又西南，逕陽關故城西，本鉅平縣之陽關亭矣。陽虎據以叛。伐之，虎焚萊門而奔

齊者也。

汶水又南，左會淄水。水出太山梁父縣東，西南流，逕菟裘城北。春秋：「隱公十一年，營之。公謂羽父曰：『吾將歸老焉。』」故郡國志曰：「梁父有菟裘聚。」淄水又逕梁父縣故城南，縣北有梁父山。開山圖曰：「泰山在左，亢父在右。亢父知生，梁甫主死。」王者封泰山，禪梁甫，故縣取名焉。淄水又西南，逕柴縣故城北。地理志「太山之屬縣」也。世謂之柴汶矣。淄水又逕郈縣北，漢高帝六年，封董濞爲侯國。春秋：「齊師圍郈，郈人伐齊，飲馬於斯水也。」昔孔子行於郈之野，遇榮啓期於是，衣鹿裘，被髮，琴歌三樂之歡，夫子善其能寬矣。淄水又西，逕陽關城南，西流注於汶。

汶水又南，逕鉅平縣故城東，而西南流。城東有魯道，詩所謂「魯道有蕩，齊子由歸」者也。今汶上夾水有文姜臺。汶水又西南流，詩云「汶水滔滔」矣。淮南子曰：「貉渡汶則死。」天地之性，倚伏難尋，固不可以情理窮也。

又西南，過魯國汶陽縣北〔五〕。

王莽之汶亭也。縣北有曲水亭。春秋桓公十二年，經書：「公會杞侯、莒子盟於曲池。」左傳曰：「平杞莒也。」故杜預曰：「魯國汶陽縣北有曲水亭。」漢章帝元和二年，東巡泰山，立行宮於汶陽，執金吾耿秉屯於汶上〔六〕，城門基塹存焉，世謂之闕陵城也。汶水又

西，逕汶陽縣故城北，而西注。

又西南，過蛇丘縣南。

汶水又西，洸水注焉。又西，逕蛇丘縣南，縣治鑄鄉故城。春秋左傳：「宣叔娶於鑄。」杜

預曰：「濟北蛇邱縣所治。」鑄鄉城者也。

又西南，過剛縣北。

地理志：「剛，故闡也。」王莽更之曰柔。應劭曰：「春秋經書，「齊人取謹及闡」，今闡亭是也。」杜預春秋釋地曰：「闡在剛縣北，剛城東有一小亭，今剛縣治，俗人又謂之闡亭。」京相璠曰：「剛縣西四十里有闡亭。」未知孰是。

汶水又西，蛇水注之。水出縣東北泰山，西南流，逕汶陽之田，齊所侵也。自汶之北，平暢極目，僖公以賜季友。蛇水又西南，逕鑄城西。左傳所謂蛇淵也。故京相璠曰：「今濟北有蛇丘城，城下有水，魯囿也。」俗謂之「濁須水」，非矣。蛇水又西南，逕夏暉城南，經書「公會齊侯於下謹」，是也。今俗謂之夏暉城，蓋春秋左傳「桓公三年，公子翬如齊，齊侯送姜氏於下謹，非禮也」〔七〕。世有夏暉之名矣。蛇水又西南，入汶。

汶水又西，溝水注之。水出東北馬山，西南流，逕棘亭南。春秋，成公三年，經書：「秋，叔孫僑如帥師圍棘。」左傳曰：「取汶陽之田，棘不服，圍之。」南去汶水八十里，又西南，

逕遂城東。地理志曰：「蛇丘遂鄉，故遂國」也。春秋，「莊公十三年，齊滅遂而戍之」者也。京相璠曰：「遂在蛇丘東北十里。」杜預亦以爲然。然縣東北無城以擬之，今城在蛇丘西北，蓋杜預傳疑之非也。又西，逕下謹城西而入汶水。

汶水又西，逕春亭北。考古無「春」名，惟平陸縣有崇陽亭，然是亭東去剛城四十里，推璠所注則符，並所未詳也。

又西南，過東平章縣南。

地理志曰：「東平國，故梁也。」景帝中六年，別爲濟東國。武帝元鼎元年，爲大河郡。宣帝甘露二年，爲東平國。王莽之有鹽也。章縣，按世本任姓之國也，齊人降章者也。故城在無鹽縣東北五十里。

汶水又西南，有泌水注之。水出肥城縣東白原，西南流，逕肥成縣故城南。樂正子春謂其弟子曰：「子適齊過肥，肥有君子焉。」左逕句窳亭北，章帝元和二年，鳳皇集肥城句窳亭，復其租而巡泰山，即是亭也。泌水又西南，逕富城縣故城西，王莽之成富也。其水又西南流，注於汶。

汶水又西南，逕桃鄉縣故城西。王莽之鄣亭也。世以此爲鄣城，非也，蓋因亡新之故目爾〔八〕。

又西南，過無鹽縣南。又西南，過壽張縣北。又西南，至安民亭，入於濟。

汶水自桃鄉四分，當其派別之處，謂之四汶口。其左二水雙流，西南至無鹽縣之郕鄉城南，郕昭伯之故邑也。禍起鬪鷄矣。春秋左傳：「定公十二年，叔孫氏墮郕。」今其城無南面。汶水又西南，逕東平陸縣故城北，應劭曰：「古厥國也。」今有厥亭。汶水又西，逕危山南，世謂之龍山也。漢書宣元六王傳曰：「哀帝時，無鹽危山土自起覆草，如馳道狀，又瓠山石轉立。」晉灼曰：「漢注作報山，山脅石一枚，轉側起立，高九尺六寸，旁行一丈，廣四尺。」東平王雲及后謁曰：「漢世石立，宣帝起之表也。」自之石所祭，治石象報山立石，束倍草，并祠之。建平三年，息夫躬告之，王自殺，后謁棄市，國除。汶水又西，合爲一水，西南入茂都淀。淀，陂水之異名也。淀水西南出，謂之巨野溝。又西南，逕致密城南。郡國志曰：「須昌縣有致密城，古中都」也。即夫子所宰之邑矣。制養生送死之節，長幼男女之禮，路不拾遺，器不雕僞。巨野溝又西南，入桓公河。北水西出淀，謂之巨良水，西南逕致密城北，西南流，注洪瀆。

次一汶西逕郕亭北，又西至壽張故城東，瀦爲澤渚。初平三年，曹公擊黃巾於壽張東，鮑信戰死於此。

其右一汶西流，逕無鹽縣之故城南，舊宿國也。齊宣后之故邑，所謂無鹽醜女也。漢武

帝元朔四年，封城陽共王子劉慶爲東平侯，即此邑也。王莽更名之曰有鹽亭。

汶水又西，逕郕鄉城南。地理志所謂「無鹽有郕鄉」者也。

汶水西南流，逕壽張縣故城北。春秋之良縣也。縣有壽聚，漢曰壽良。應劭曰：「世祖叔父名良，故光武改曰壽張也。」建武十二年，世祖封樊宏爲侯國。

汶水又西南，長直溝水注之。水出須昌城東北穀陽山南，逕須昌城東。又南，漆溝水注焉。水出無鹽城東北五里阜山下，西逕無鹽縣故城北。水側有東平憲王蒼冢，碑闕存焉。元和二年，章帝幸東平，祀以太牢，親拜祠坐，賜御劍於陵前。其水又西流，注長直溝。溝水奇分爲二。一水西逕須昌城南入濟。一水南流，注於汶。

汶水又西，流入濟。故淮南子曰：「汶出弗其，西流合濟。」高誘云：「弗其，山名，在朱虛縣東。」余按誘說是，乃東汶，非經所謂入濟者也，蓋其誤證爾。

校記

〔一〕與 原本誤作「於」，據殿本改。

〔二〕水湟 「湟」殿本作「隍」。

〔三〕東南流 此句之下，他本原有「汶水西南」至「龜陰之田是也」六十四字，移至經文「過博縣西北」之後。詳見校四。

〔四〕龜陰之田是也 此句之前六十四字由前文移此，參見校三。

〔五〕〔又西南〕二句 他本均作注文，爲「汶水又西南，逕魯國汶陽縣北」。戴震手校水經注批語：「東原云，『汶水』二字後人所加；『逕』當作『過』，此後人因經誤入注，而增改之也。」詳見戴震全書之三十六補遺。

〔六〕耿秉 原本作「耿恭」，據後漢書耿秉傳改。

〔七〕非禮也 原本作「是也」，據春秋左傳桓公三年改。

〔八〕亡新 殿本作「鉅新」。

溜水

溜水出泰山萊蕪縣原山。

溜水出縣西南山下，世謂之原泉。地理志曰：「原山，溜水所出。」故經有原山之論矣。
淮南子曰：「水出目飴山〔一〕。」蓋山別名也。東北流，逕萊蕪谷，屈而西北流，逕其縣故城南。從征記曰：「城在萊蕪谷，當路阻絕，兩山間道由南北門。」漢末，有范史雲爲萊蕪令，言萊蕪在齊，非魯所得引。舊說云，齊靈公滅萊，萊民播流此谷。邑落荒蕪，故曰萊蕪。禹貢所謂「萊夷」也。夾谷之會，齊侯使萊人以兵劫魯侯，宣尼稱「夷不亂華」是也。余按泰無、萊、柞，並山名也，郡縣取目焉。漢高祖置。左傳曰「與之無山，及萊柞」是也。應劭十三州記曰〔二〕：「泰山萊蕪縣，魯之萊柞邑。」

溜水又西北轉，逕城西，又東北流，與一水合。水出縣東南，俗謂之家桑谷水，從征記名曰聖水。列仙傳曰：「鹿皮公者，溜川人也。少爲府小史，才巧，舉手成器。山岑上有神泉，人不能到。小史白府君，請木工斤斧三十人，作轉輪，造懸閣，意思橫生。數十日，梯道成，上其巔作祠屋，留止其旁，其二間以自固，食芝草，飲神泉，七十餘年。溜水來山

下，呼宗族，得六十餘人，命上山半，水出，盡漂一郡，沒者萬計。小史辭遣家室令下山，著鹿皮衣，升閣而去。後百餘年，下賣藥齊市也。『其水西北流，注淄水。』

淄水又北出山，謂之萊蕪口，東北流也。

東北過臨淄縣東。

淄水自山東北流，逕牛山西。又東，逕臨淄縣故城南，東得天齊水口。水出南郊山下，謂之天齊淵。五泉並出，南北三百步，廣十步，山即牛山也。左思齊都賦曰『牛嶺鎮其南』者也。水在齊八祠中，齊之爲名起於此矣。地理風俗記曰：『齊所以爲『齊』者，即天齊淵名也。』其水北流，注於淄水。

淄水又東，逕四豪冢北。水南山下有四冢，方基圓墳，咸高七尺，東西直列，是田氏四王冢也。

淄水又東北，逕蕩陰里西。水東有冢，一基三墳，東西八十步，是烈士公孫接、田開疆、古冶子之墳也。晏子惡其勇而無禮，投桃以斃之，死葬陽里，即此也。

淄水又北，逕其城東。城臨淄水，故曰臨淄。王莽之齊陵縣也。爾雅曰：『水出其前，左爲營丘。』武王以其地封太公望，賜之以四履，都營丘爲齊，或以爲都營陵。史記：『周成王封師尚父於營丘東就國〔三〕。』道宿行遲，萊侯與之爭營丘。逆旅之人曰：『吾聞時難

得而易失，客寢安，殆非就封者也。」太公聞之，夜衣而行至營丘。陵亦丘也。獻公自營丘徙臨淄。余按營陵城南無水，惟城北有一水，世謂之白狼水，西出丹山，俗謂凡山也。東北流，由爾雅出前左之文，不得以爲營丘矣。營丘者，山名也。詩所謂：「子之營兮，遭我乎狃之閒兮。」作者多以丘、陵號同，緣陵又去萊差近〔四〕，咸言太公所封。考之春秋經書：「諸侯城緣陵。」左傳曰：「遷杞也。」毛詩、鄭注并無「營」字，瓚以爲非近之。今臨淄城中有丘，在小城內，周迴三百步，高九丈，北降丈五，淄水出其前，故有營丘之名，與爾雅相符。城對天齊淵，故城有齊城之稱。是以晏子言：「始爽鳩氏居之，逢伯陵居之，太公居之。」又曰：「先君太公，築營之丘。」季札觀風，聞齊音曰：「泱泱乎大風也哉！表東海者，其太公乎？」田巴入齊，過淄自鏡。郭景純言：「齊之營丘，淄水逕其南及東也。」非營陵明矣。獻公之徙，其猶晉氏深翼名絳，非謂自營陵而之也。其外郭即獻公所徙臨淄城也，世謂之虜城。言齊湣王伐燕，燕王噲死，虜其民寶居郭〔五〕，因以名之。秦始皇三十四年，滅齊爲郡，治臨淄。漢高帝六年，封子肥於齊爲王國，王莽更名濟南也。戰國策曰：「田單爲齊相，過淄水，有老人涉淄而出，不能行，坐沙中，單乃解裘於斯水之上也。」

又東，過利縣東。

涇水自縣東北流，逕東安平城北。又東，逕巨淀縣故城南。征和四年，漢武帝幸東萊，臨大海，三月耕巨淀，即此也。縣東南則巨淀湖，蓋以水受名也。

涇水又東北，逕廣饒縣故城南。漢武帝元鼎中，封菑川靖王子劉國爲侯國。

涇水又東北，馬車瀆水注之。水首受巨淀，淀即濁水所注也。呂忱曰：「濁水一名涇水，

出廣縣爲山。」世謂之冶嶺山。東北流，逕廣固城西。城在廣縣西北四里，四周絕澗，阻

水深隍。晉永嘉中，東萊人曹嶷所造也。水側山際有五龍口。義熙五年，劉武帝伐慕容

超於廣固也，以藉險難攻，兵力勞弊。河間人玄文說裕云：「昔趙攻曹嶷，望氣者以爲

涇水帶城，非可攻拔，若塞五龍口，城當必陷。石虎從之，嶷請降。降後五日大雨，雷電

震開。後慕容恪之攻段龕，十旬不拔，塞口而龕降。降後無幾，又震開之。今舊基猶存，

宜試脩築。」裕塞之，超及城內男女，皆悉脚弱〔六〕，病者大半，超遂出奔，爲晉所擒也。然

城之所跨，寔憑地險，其不可固城者在此。濁水東北流，逕堯山東。從征記曰：「廣固城

北三里，有堯山祠，堯因巡狩登此山，後人遂以名山。」廟在山之左麓。廟象東面，華宇脩

整，帝圖嚴飾，軒冕之容穆然。山之上頂，舊有上祠，今也毀廢，無復遺式。盤石上尚有

人馬之迹，徒黃石而已，惟刀劍之踪逼真矣。至於燕鋒代鏑，魏鉞齊鋌，與今劍莫殊，以

蜜模寫，知人功所制矣。西望胡公陵，孫暢之所云，青州刺史傅弘仁言得銅棺隸書處。